

基督徒 ê 品格

經文：箴言 22:1

09-10-06

咱知箴言是所羅門王智慧 ê 教示。一般解經愛看前後文，免得斷章取義。總是箴言卻 e-tàng 一節一節來瞭解，而且要細膩 tam、慢 gím-mì，chiah ē-tàng 吸收。提後(3:16)：”上帝默示 ê 經也有利益佇教示，佇督責，互人歸正，引 chhōa 人學義理”。Chit 句話對 tī 箴言是 siōng 切實際 ê，因為箴言就是教示咱按怎生活。咱若照伊 ê 指示生活，就會得著能力成做信仰有深度 kap 力度 ê 人。

每 chit ê 人有家己價值觀，主要受著環境 ê 影響，我受著父母 ê 影響上大。真正 ê 信仰應該 ē-tàng 改變人 ê 價值觀，親像：退修會陳牧師提起 Bonhoeffer ê 家庭本是文化基督徒，就是理性相信耶穌基督，總是卻看不慣勢教會或是信徒 ê 作為，所以平時無參加聚會，一冬可能只守復活節 kap 聖誕節等 chit 種大節日。總是 Bonhoeffer 因為佇美國協和神學院進修時期，佇紐約哈林區 ê 烏人教會真正體驗著福音定根佇社會 ê 力量，伊見著了上帝 ê 痛疼、恩慈 kap 憐憫為著受壓迫 ê 人帶來屬靈 ê 氣氛。An-ni 了後，伊不斷反省 kap 重估家己 ê 信仰，最後伊願意用生命跟隨基督，甚至成做殉道者。伊一生跟隨基督就是以山上寶訓作基礎，另外耶穌 mà 用新 ê 誠命 kā 咱講：「你著盡心，盡性，盡意疼主你 ê 上帝(Mt 22:37)。」咱看所羅門 ê 王朝並未持久，照列王記上卷記載所羅門用七冬完成聖殿，卻開十三冬為家己造王宮（6：38-7：1）。伊無法度控制家己 ê 私慾，無論是財富、權力、愛情攏容易放困難收。伊 kah-ná 互愛成做天下第一 gàu 人所束縛，漸漸失去對上帝 ê 順服，聖經對伊一生做最後評論講：「所羅門行耶和華所看做歹 ê 事，無專心 tè 耶和華，親像伊 ê 老父大衛。」（王上 11:6）。所羅門用心追求智慧，卻無法度持守伊給人 ê 忠言勸誡。可見真正 ê 智慧是愛不斷反省 kap 實踐，chiah ē-tàng 互咱有能力面對誘惑、持守正道。

咱現在 ê 社會充滿真濟犯罪 ê 事件，探討因端，就是人 ê 「貪心」，貪啥物？傅士德佇「基督徒看錢、性 kap 權勢」一本冊 ê 引言中講：「今仔日信徒迫切需要按怎過誠實 ê 生活，特別是佇面對有關金錢、性 kap 權勢 ê 問題時，這 ê 需要就 koh 卡迫切。因為這三方面 ê 問題，比任何問題攏深入 ê 影響咱；比任何問題 koh 卡糕纏不清，引起 koh 卡 chē 議論；mà 有 koh 卡 chē 力量互人類帶來咒詛或是祝福；同時世界上再無別 ê 物件，親像金錢、性 kap 權勢 hit 種互人類所樂意追求，基督徒實在需要對 chiah-ê 問題作回應。」今仔日，錢已成做人生追求 ê 上高目標，人為著趁錢，e-thang 不擇手段，甚至犧牲品格。最近聽

著我姨子 ê 小女兒買機票時互伊 ê 同學騙 18 萬台幣，因為她對家己 ê 同學 ê 信任變成她受騙 ê 因端。chit 件代誌互我感覺有時咱 ê 品格 kap 友情只用小寡金錢就 ē-tàng kā 伊賣 lah。施明德反對阿扁 ê 事件，雖罔價錢卡高，總是基本上是全款 ê 心態，莫怪高俊明牧師稱伊是賣台第一勇士。

今仔日 ê 經文講：「好名聲卡贏過大發財；恩惠卡好金銀(v. 1)。」美好 ê 品格比財富 koh 卡重要、koh 卡可貴，因為財富生不帶來死不帶去，品格卻是永遠 ê，當咱過著追求豐盛物質享受 ê 時，人生 ê 失去方向。人總有一日要面對死亡，á 咱 ē-tàng 帶去永遠 ê Kan-taⁿ 屬靈 ê 生命 kap 品格。施明德以前是天主教徒，現在為著財富、權勢，離開上帝，出賣靈魂，出賣台灣。耶穌講：「無人會服事兩個主人；因為伊會怨恨 chit-ê，疼 hit-ê；á 是會 tùi 重 chit-ê，看輕 hit-ê；lín bōe-ōe 服事上帝續服事錢財。一個人不使同時事奉上帝、又事奉瑪門 (Mt 6:24)。」金錢是上好 ê 奴僕，卻 mà 是上歹 ê 主人。當你是伊 ê 主人時，伊會是人生上好 ê 助手。反轉若是金錢變成主人 ê 時，伊會向你討一切無窮無盡。耶穌講：「人若得著全世界，來喪失伊 ê 性命，有甚麼利益？á 是人 beh 出甚麼來對換伊 ê 性命。」án-ne 基督徒該怎樣去作 neh? kám 講 ài 咱攏做喪鄉人，不趁錢或是完全放棄事業 mah?。約翰衛斯理講起基督徒 ê 金錢觀時伊講：「要盡量 ê 趁、盡量省、盡量 ê 奉獻」。聖法蘭西斯分享伊關懷喪赤 ê 經驗講：「互家己 jú 少，幫助別人 jú 濟，心中喜樂 kap 屬靈 ê 福氣 mà 愈豐富。」因為快樂 ê 生活 ê 根源 tī 上帝 ê 恩典，Kan-taⁿ 佇學習基督 ê 生活 kap 教訓中 chiah ē-tàng 得著滿足，chiah ē-tàng 建立咱 ê 品格 kap 靈性。

品格 ê 培育也著對細漢時陣開始著手。教會公報最近有一篇報導講：今年台灣品格教育夏令營真熱門，這是好現象。咱 ê 主日學 mà 真注重品格教育，會記得舊年聖誕節佩璇老師用小朋友 ê 品德評價作成耶穌 ê 小馬槽，chiah-ê 評價是老師將小朋友 ê 表現 kap 彼此關懷 ê 好品德紀錄落來，成作獻互耶穌 ê 聖誕禮物，是非常有意義 ê 創作。咱知影摩西佇幼兒時期，透過老母學會曉敬畏上帝 kap 家己民族 ê 信仰。雖罔伊 tī 法老 ê 王宮長大，總是富貴 ê 生活並無互摩西 ê 信仰動搖。眾細 kiáⁿ ê 未來掌握佇父母 ê 手裏，總是無久 ê 將來，hiah-ê gín-á 就會展翅飛高。真歡喜咱約書亞團契 ê 父母攏真重視宗教教育，希望透過父母、教會 ê 努力，互小朋友佇日常生活中將基督 ê 品格融合佇 In ê 生命裡，將來 chiah ē-tàng 散發出有基督馨香氣味 ê 品格。

今 á 日 ê 經文對 tī 現今 ê 台灣人有極深 ê 意義，因為最近台灣 ê 政局非常 bē 穩定，有可能佇某一寡方面阿扁總統確實互咱失望，親像：公權不力，致到社會不安 kap 價值觀錯亂

等，甚至身邊 ê 人 kap 子婿不法。總是 túi 另外一 ê 角度來看，若是台灣 ē-tàng an-ni ho 政府將反貪污成做台灣永恆 ê 價值則，chit 擺行動是正面 e-tang 受 o-lo-ê。Chit 擺行動雖罔對阿扁總統非常不公平，因為行動者無用全款 ê 尺度來檢驗國民黨，馬英九 kap KMT 貪圖台灣人 ê 財產是天文數字，親藍學者、媒體 m̄-na 假仙無看著，甚至 kā 伊包庇。佳哉最近立法院上尾清醒過來。國民黨提出「遊說法、政黨法、公職人員財產申報法、政治獻金法」等陽光四法，民進黨 mà 推出「陽光九法」，列入立法院下會期優先法案。這是一個完備台灣反貪法制 ê 契機，chit-ê 長期治理永久安定 ê 反貪立法案，若是 ē-tàng 因此會得 thang 確立，an-ni 阿扁總統 kap 伊 ê 家庭所受 ê 苦，將為台灣帶來新 ê 生機。若是立法 bô 成功，其實 chit-ê 法案 ê 提出 ê 互人民覺醒，對將來接掌政權者 mà 有監視 ê 作用。台灣經過 chit-ê 試練，相信人民 ê 民主素養應 thang koh 卡上一層樓。

潘霍華講：「一個人必須完全過著今世 ê 生活 chiah ē-tàng 學習著信心。一個人必須放棄 kà 家已造成某種人物 ê 企圖，無論是想作聖人，義人或不義 ê 人…就佇 chit 種 ê 生命中，咱 chiah ē-tàng kā 家已無條件放佇上帝 ê 手裡，參與伊佇世上 ê 苦難，kap 基督佇客西馬尼園同齊警醒。這就是信仰，就是悔改，mà 是一個人成做人 kap 基督徒 ê 意義。」 só-í 信仰毋是溫室 ê 花蕊，基督徒蒙主呼召，就 beh 用入世 ê 精神，佇現實 ê 社會裡，過著造福家己、厝裡 ê 人 kap 社區 ê 生活，按呢 chiah ē-tàng 榮耀咱 ê 主。